

4.

सतु संगय सुत्य् शोद पान थोवुम ।
मनु मंजुलिस मंज सोवुम सुय ॥
ग्वरु शब्दय सुत्य् मन शोमरोवुम ।
प्रज्जनोवुम तय गॅजमो दुय ॥

5.

कॉच्चाह दया चे दातो कॅस्थम ।
बोरस्थम हृदयस मंज मेय बाव ॥
पनुनुय नावुय पानय पोरस्थम ।
अडु छॉविस येति ओनस्थम छाव ॥

6.

पानय शिव छुख पूजुनु यिवान ।
पानय पूजान पानय पोशा ॥
सिरियस चॅन्द्रस जुच्यु बाॅगरावान ।
पानय दिवान तोरुक होशा ॥

7.

ध्यान स्वरुनुय नाव परुनुय ।
भवसरय तरुनुय चै छुय ॥
कर्म तँस्य् अर्पण चै करुनुय ।
अवु जिंदय मरुनुय चै छुय ॥

8.

हा म्यानि मूर्खा मनु ।
चुय कोनु छुख चैनान ॥
नशवर यि संसार सोरुय छुय ।
चुय कोनु छुख मानान ॥

9.

ओमुय पोरुम, ओमुय सोरुम ।
गोरुम ओमुय व्वंदुसुय मंज ॥
यछायि दोबरिथ तृषण मॉरुम ।
कोरुम गतु गुं शहसुय मंज ॥

10.

मनुय दागव बॅरिथ वुछुम ।
हेछिम बॅक्ती तु छुम सुय ॥
पाँन्य् पानय पानस तोछुम ।
सु छुम प्रज़लान पानुसुय ॥

11.

दय छुय नु मेलान अथ्रु बुथ छलुनय ।
न छु मेलान वलुनय अँतलास ॥
दय छुय मेलान मनि मल गालुनय ।
फवलुनय पोश कर विषय व्वपुवास ॥

12.

न छु मेलान दय डुमु डुमु करुनय ।
न छम छम कॅरिथ नचुनय सुत् ॥
दय छुय मेलान मंज़ मनि बेहनय ।
वॅचुनय शोमरॉविथ मील्य् कृत्य् ॥

13.

बार छुय नु शानन यिय आस मानन ।
कर अर्पण तस पान पुशाराव ॥
विज्ञानुक ज्ञान बरिय चै बानन ।
लोट रोज़ख म्वकली हावु बाव ॥

14.

यिय करख तस अर्पण कर च़ुय ।
ब्योन रूज़िथ कर सोर व्यवहार ॥
करुवनि क्रेयायि रोज़ी नु अदु ब़ुय ।
शम दम दिथ लोट गछ़ियो बार ॥

15.

क्याह करु वनु कस गोमुत क्याह छुम।
वनुनस थोवनम न वार मदनन ॥
दोर ना छुय यि संसार वुछुम ।
गछ़ान छु येति समहार बदनन ॥

16.

अँन्दरी यमु भयि सेंदुरय गँयम ।
 नेन्दुरय गँजिम तु लँजिम थर ॥
 आसान शूरमस छँन्दरी छँन्दरी ।
 ब्रह्म रँन्दरी मंजु वुछुम सथ ग्वर ॥

17.

पानो मतु आसतु वन वन करान ।
 हॉरिथ वँन्य् वँन्य् सॉरी गँय ॥
 छ्वपु कर पानो र्वपु सुंज छ्वप छय ।
 दय अदु गछियो पानय दँय ॥

18.

पारस बनान जपु चाने सुत्य् ।
 कुदंन ज़न चमकान सुमरनि सुत्य् ॥
 नज़र साफ गछान मन तावुनु सुत्य् ।
 यिथय पाँठ्य तँस्य् मीलिथ गँयि कृत्य् ॥

19.

योदवय बोज पनुनि ह्यख चय सामया ।
कामुय जांह नो करी चे पथ ॥
मूहस क्रूधस लूभस दिख दामुय ।
ध्यालन बरी पानु लोलु अमर्यथ ॥

20.

पोज पानु ऑसिथ अपजिस च लाराना ।
तगियेय कड़ अपजि मंजु पोज गाश ॥
अपजिस मंज रचि रचि छुय नेरान ।
कमि तान्य् सत् सिरियुक प्रकाश ॥

21.

सथ सुमरिथ चय कथ कर जीवो ।
मेछर व्वपदी जे वि पानय ॥
मिलुचारु चानि सुत्य् ख्वश गछि शिवो ।
विष्णार्पन क्रैया गछि जानुय ॥

22.

आगस प्रछ्योम कत्यन बु ज़ागय ।
कमि ज़ागि सुत्यन् मेलुहम चय ॥
दोपनम बावु पोश लाग अनुरागय ।
अमि लागि च़ेय निश यिमु पानय ब्रय॥

23.

विषयय मॉरिथ राजकर मनुसुय ।
बाज नो अदु शोथरुय हैयि कांह ॥
लब्रहन अती युस बॅसिथ मंज़ तनुसुय।
ज़गतुक राज़य शहनशाह ॥

24.

दूर नो बॅसिथुय छुय मंज़ पानस ।
मृगु नाभि मंज़बाग नाफु यिथु छुय ॥
छांडान हरुनय सॉर्यसुय जहानस ।
मंज़ लब पानस गछ़तस लय ॥

25.

बंदुगी येलि येलि साहिबस कराम ।
पानय छय अँछ बंद च़े गछान ॥
सौबूत अंदरुय आसनुक य्वहय छुय ।
तेलि तेलि तस बंदुगी वातान ॥

26.

पानय पुज तय पानय श्राख ।
कठ च़ुय पानय पानय ग्राख ॥
पानय नारस प्यठ दिवान पाख ।
शिव छुय पानय कांह नो ब्याख ॥

27.

वावुचन दावन राम म्वखतु तारुनाव ।
खसु वसि वारु वारु गछि जानय ॥
मनुचे ग्वफि मंज़ ध्यानय दारुनाव ।
सास गाह पछि नोन नेरि पानय ॥

28.

क्वट्यलतायि हुंद मल मे जॉलिथ ।
 म्वल मे खारुम ज़रु ज़रय ॥
 श्वद हृदय म्योन वुछिथ तंबुलख ।
 यिथ बनख सोदागरय ॥

29.

रुमव रुमव ऊँ ऊँ पौरुम ।
 प्रजलिथ श्यर मन सपदुन शाद ॥
 इन्द्रेय चूरन रुमु गंड कौरुम ।
 मारुख पानय करुम आज़ाद ॥

30.

सुमरने मंज चानि रोज़य ।
 गॅछिथ लीन मॉरिथ विषय ॥
 दोरि लॉरिथ यिख च़ु पानय ।
 वुछख पानस मेय निशे ॥

31.

मनि खाक तनि अँतलास वल ज़ीवो ।
मन व्वटि थियियो अदु पानय ॥
प्रथ काँसि बावु मनु सान कर सीवो ।
लबुखो मनि ग्वफि जानानय ॥

32.

हा मनु रठ रज़ चन्चलताये ।
माये स्वरुन सुय आदन यार ॥
ज़ाग लाग मोकर कांह पल ज़ाये ।
साये थविय युस छु पानु म्वखतार ॥

33.

कँह नो यस निश तस सोरुय छुय ।
सुय लोरुय छुय तत् संगस ॥
द्वयव खोरव हून मोरुय छुय ।
नेंदुर नंगस छय प्यठ प्रंगस ॥

34.

लोलु नज़रे चानि न्यरलीफ कॅरनस ।
 शाफ पाप आँब गाँब गॅयि पानय ॥
 सायस रूज़िथ ब्रोंह पकुनॉवथस ।
 सास सिरिथि नोन द्राख तीज़वानय ॥

35.

कनुवुय बूज़िथ मनि मंज़ सॅन्य्राव ।
 गॅन्य्राव लोल यथनु पेट्थय कांह छुय ॥
 चिहि पतु चिहि पापु परदय तॅन्य्राव ।
 बॅन्य्राव परमु हंसन हुंद सुय ॥

36.

सथ ग्वरो बस छम चॉनी आशा ।
 बाशा करुवुन्य् नेशब्बद छस ॥
 पेमुच़ ज़न छस प्रानु रोस लाशा ।
 गाशा अनुम दस बस्तु बुय छस ॥

37.

प्रथ क्षण आगुर च आसान ग्रजान ।
दजान हावान नार संसार ॥
आँथु रोस वनान छी येति बोजवान ।
प्रजुवान रोज पोज लोलु दर्बार ॥

38.

लोल छुय सत् च्यथ लोलुय अमर्यथ ।
प्रथ कुनि ग्रंथुक छुय लोल सार ॥
लोलु रोस ज्ञानी ति गछान भ्रमित ।
लोलुक सग छुय अशिची दार ॥

39.

सीवायि शरणागँती छय मेलान ।
गँछिथुय शरण सुय कृपा करान ॥
कृपा मायायि पर्दय तुलान ।
सर्वग्य् गव लूक छुय मेलान ॥

40.

उद्धव ओसुय लोलु रोस ज्ञानुवान ।
गूकल सूजुन प्रावि अदु लोल ॥
नत मस्तक रूदुय सुय बोज़वान ।
वुछुन गूपियन हुंद हृदय कृष्ण ओल ॥

41.

अँदरी पादन हुंद ध्यान दारान ।
छारान छारान वुछमख पूर ॥
दिचथम अँछ यिमु आसम थारान ।
वुछमख सास भास्कर कुय नूर ॥

42.

ज्ञानस थोद नो श्रोचरावी कांह ।
ग्वरु ध्यानस थोद नु बैयि कांह ध्यान॥
समतायि यूग ज्ञॉनियस छुय व्वपदान ।
पानय समयस प्यठ आत्म ज्ञान ॥

43.

अभ्यासु किन्त् मनुसुय मंजु गोरुय ।
 मॉरुम मनुची इन्द्रेय आशा ।
 तीलु दार ज़न मन अखंड लोगुम ।
 प्रोवुम ग्वरु रुपु परमु प्रकाश ॥

44.

आशा तृशणा सॉरुय त्रॉवुम ।
 प्रोवुम मनु इन्द्रेय व्वपुवास ॥
 सथ ग्वरु चरणन तल पान त्रोवुम ।
 नोन द्राव पानय भास्कर सास ॥

45.

भय त्रॉविथ अन्तःमन शांत गोम ।
 ब्रांत गॉयि गॉब तय चॅजमो खय ॥
 नय वॅज पानय छय वनान ऊँ ऊँ ।
 चोमो परमु दामुक लोलु मय ॥

46.

गर्मस सर्दस मंज ह्युव रोज़ी ।
ह्युवुय रोज़ि मान अपमानस मंज ॥
स्वखु द्वखुसुय मंज समता थावी ।
प्रावि परमु आनंद पानस मंज ॥

47.

हा पानु अपजिस मंज छालु मारान ।
रूदुख पॅजिस निश अवय चु दूर ॥
अपजिस मंजुय रोज़तो छारान ।
सतुक प्रकाश पौज नेरि बरपूर ॥

48.

कथ कर सतुची सथ सुमरण कर ।
पथ मो रोज़ अखंडु पॉठ्य स्वर ॥
वथ लबख पनुनिस मतस मो थर कर।
प्रथ तनुसुय मंज वुछख सथ ग्वर ॥

49.

कुनुय परतो कुनुय स्वर तो ।
 कुनुय वुछख सारुयुक सार ॥
 कुनुय आसुवुन छुय अनन्तो ।
 कुनुय दिवान भवुसरु तार ॥

50.

सथ ग्वर मनु मंजुलिस मंजु सोवुम ।
 वावु दावव सुत्य् दिचमस ज़ीर ॥
 सूहम शब्दय उध गीत गोवुम ।
 नोवुम मन तय बोवनम सीर ॥

51.

साहिबो ज़ीर दिनुसुय बुय लगुयो ।
 सगुयो दीक्षशा लोलु अशि बुय ॥
 कल्पु वृक्षिच पापन लागि छगयो ।
 म्यूठुय फल नेरि ख्यावथो च़ुय ॥

52.

साहिबन दोपनम कोताह परख ।
 रठ कीवल अख दधि सुंद नाव ॥
 अन्तु रोस सँदरस किथु पॉठ्य तरख ।
 दम द्यू नोन नेरि सूहम बाव ॥

53.

क्याह जलवु छु तत्त मॉर्यफतस ।
 सतस असतस बसुवुन सुय ॥
 बेयि दज़ुवनिस आदुम्य् रतस ।
 हतस मॉरिथ न्यरलीफ सुय ॥

54.

साहिबो लगुयो चॉनिस नावस ।
 वावस अथि कॅन्य् शोछ सोज़ान ॥
 जन्मादिकन हंदिस गालान लावस ।
 सहँज़ु स्वबावस पानु बोज़ान ॥

55.

शरण्य चैय छस पुशरिथ सोरुय ।
मोरुय ज़न ओबरस छस नचान ॥
शाफ गॉलिथ त्रोवुथ यलु तोरुय ।
पोरुय खॉरिथ च़ु पानु पचान ॥

56.

विषयन पतु पतु वॉन्स रावुरॉवुम ।
हावु बावन येति थॉनम नु ज़ान ॥
सुमरणि ज्ञानस शानु नोमरॉविम ।
प्रोवुम आनंद रथि खोत पान ॥

57.

युस ओश खारी आयस्थानस ।
जानानस गोड दिथि अँदरय ॥
पम्पोश फवलुनस सेकि मॉदानस ।
पानस मंज़ डेंशी स्वंदरय ॥

58.

माया ज़ीवन नचुनावान छय ।
 सुत्य् रोज़ान छय ज़न छाया ॥
 काया अपज़ुय पँज बासान छय ।
 भक्तव यिय गँयि भगवत माया ॥

59.

अंतु रोस समयस दोरान रूदुख ।
 ब्रोंह दोरुनय सुत्य् दूर्योय सुय ॥
 पोत फेर पानो थर विषयन कर ।
 हरु हरु परुनय लबुहन सुय ॥

60.

हा ज़ीवु अहंकारण वोलुनख ।
 लोसुवुन सिरियि च़ु अँछ ज़ु खोल ॥
 ज़न्मन फीरिथि च़ु कोताह दोलुनख ।
 सुलि गरि प्वन्य् पाफ पनुनी तोल ॥

61.

अपञ्जिस दम मारुन छुनु गाटुजार ।
छुख वनान गरुबार करान बुय ॥
कय थैलि फुटी अट्टु पोनिय सार ।
बुय बुय करुन त्राव सौरुय सुय ॥

62.

ग्वरु सुमरण कर ग्वर छुय दयावान ।
रथि पान खारी अँछ वँट्यथुय ॥
कनुनुय सन च़ुय गछियो कनुवान ।
बोठ खारी योद च़ु छुख फँट्यथुय ॥

63.

लोलु ओश त्रॉविथ वुछुस वतन ।
हतन मंज़ प्रज़नावुन सुय ॥
कुनी रंगु छुय रंगन सतन ।
नच़ुवुनि वँच़ शोमरावुख च़ुय ॥